

2 Timotius

Paulus arye peterebuk ura, diba tenebuknye, Timotius ati, bitinye talak sekeibuk yupu

Abuku 2 Timotius ara, Paulus arye, Timotius ati sekuka dopdeibuk. Paulus arye Timotius ati, abuku bitinye ning sekuka dopdeibuk ara, Roma mutuku weik ninye deiyoknye Nero birye, Paulus tapu koubuka wenena aik fumbisik dongobuk ura, daulamuk ani, anoutam talak arye abuku sekuka, Timotius dam dopkwetebuk. Atalak ara, Paulus arye, ‘Kume, like mitikanun ton akunum uplyop ura, na opnamniak’ tenen, akunum kel bikdamuk. Aning ati, ilil kanye bobukce, ‘Timotius ara, minopce na dam yatubuk, ila tonap, eibdatinimnye’ tenen, “Timotiuso, na dam minopce yalyame,” nyabuka, abuku sekuk (2 Timotius 1:4; 4:9,21).

Timotius ap, Paulus ap, neika fil dolamrik anya arye, Paulus arye Timotius ati kanye deibuk (Filipi 2:19-22). Abuku noutamak ara, Paulus arye, ‘Timotius arye, Efesus mutuku nang melina ati, weik mambul yupu peterenamle ning ara anye’ tenen, sekuka deipsuk ning ara, ani. “Tilila yupu peteren nang arye nyanyak yupu deice arye, Yesus el laka teleb yupu, ninye lyena yupu malye upsilyak ati, narye an ti petelamkesi yupu ara, moubuka talipmince, kalikinamlyame,” nyabuk (1:14, 3:14). Tonda, “Allah yupu peterepminyebuk, ikin ning an nong deice deipkikca babye, kanye kintinina uk unamlame. Peterena ara, batakna fia kume,” nyabuk (1:3-7; 4:1-8).

Paulus arye, “Telebe” nyana ati, nyabuk yupu

1 ¹ Telebe, na Paulus arye Timotius ati abuku sekeibkine. Anda, na kanye delikununye ulyama ati ara, anda na mi nyapkine. Allah arye na ti, ‘Anye bira, Yesus Kristus el yupu dobuka peterelbana ati, deiyoknye, Rasulnye unamle,’ teneamnukce, wipdeipnuka ati, afil uk donune. Allah arye, “Yesus Kristus ati, ninye mutuku-mutuku nirya dib tenebikcop ura, fia kam una deiyok ning arinamsine,” nyabuka, nyalilamsuk yupu dobuka, na Paulus arye peterelbanune.

²Ura na mi Timotiuso, nun Ni Kopropa Allah ap, nun Deiyoknye Yesus Kristus ap, sik bitinye arye, an Timotius ati, bico tenekurudakce, sik kanye aryuk talya melikururak ning ap, ura nun malye winina ati, wenebuka talya oplopsitiring bukni, aning namin kisururakce, nun patasilye ning urdem aryuk arisirice ning ap, tonda, ‘Yuk nang ap yu ulana kumce kanye deibuka, telebuk neika unamle’ tenen, arikurak deiyok ning ap, arikururake. ‘Aning nirya ara, tuba-tuba weik arye tabakuka arinamkirak’ tenen, an Timotius ati, Allah morokunune.

Paulus arye Timotius ati, ‘Batakana kum arye, fia pi dobuka, fil teleb ubuka donamle’ tenen, nyabuk yupu

³Na apu yapu arye, Allah el si erebuka, el fil uk dolamik touk, na babye atonun, na kanye talima noutamak ara, malye ning duknuna fia kum arye, Allah el fil ati fia diksukumuk uniryne, fil donune. Atalak noutamak nirya ara, kiting noutam babye, lukunyan babye nirya, Allah ati moronye talak noutamak, an ti tenekiniryne, kanye deibuka Allah ati, “Telebe,” nyakunune. ⁴An ap, na ap, neiktoto fil dolamnumu bukni, yuk-yuk binumu talak ara, ance engeplum ning ara, ila tonap tenekunune. Ati, ‘Na kanye deibuka fin-fin arye unamne’ tenen, ‘Se, na mi Timotius ap, eipdatinimiryne, neiktoto utinimnye’ tenen, fia patanulule.

⁵Tonda, ila tonap, tenekunun ning ara, nyapnukine. Ara, an nu kopropa Lois ap, anin kopropa Eunike ap, sik bitinye arye, lik tenena fia kum aniryuk, weik arye dib teneamrik touk, an babye, Yesus ati dib tenelyame. Na kanye bokoltona kum arye, an ti, akunum kel bikamkise. ‘Anye Timotius bira, Yesus ati dipkoprop weik arye diba tenelule,’ tenekunune.

⁶Aning akunum kel bikamkise ati, ayupu ton nyapnukine. Ara, minop talak na taruk an nong deice deibuka, Allah moropkisa deice arye, Allah el fil dona deiyok ning aripkuke. Ura, ninye arye, ‘Nun uku tangablyak’ tenena ati, ‘Uku buk weik arye dipnul’ tenen, si mikip arye uku pulamak touk, ance, ‘Allah el fil dona deiyok ning aripnuka deice arye, fil fia teleb ubuka donamne’ tenen, fia pi dobuka piripdenamyame. Na Paulus arye nyapkine. ⁷Mikip arye fil donamyame nyapmakina deiyok ara, Allah El Dib Kanye mikip arisilye ning ara, ‘Ilil asa unamak’ tenen, kum aripsuke, aning kum bukni, mikip una ap, yuk ninye nirya ati bico tenena ap, ‘Talye luba kibuka kum unune’ tenen, kanye kalikildana ap, ‘Ateleb ning nirya wininamak’ tenen, El Dib Kanye mikip arisulula ati nyapkine. Allah arye, ilil una ap, teniltona ap, tenen ning ara, kum arisulule. Talima darapdongobuka, mikip arye talye luba kibuka un ning arisulule.

⁸Aning ati ara, nun Deiyoknye Yesus, el yupu laka nyabuka peterena ati, ilil una ap, tonda, ‘Se, yuk nang arye akutunamniak do?’ tenen, alye una ap, fia kum unamyame. Aning atonun, ‘Se, na peterenulula

deiyoknye Paulus ara, tapu koubuka wenena aik dongobik ati, na alye dakuka unamne,' tenena meme. Aning nirya kum bukni, na arye ninye lyena ati, Yesus el laka teleb yupu peterepnibuk, malye nang arye, na nong deice ikin ning weik delininyak touk, an babye atonun, 'Winipnica babye, telebe uka,' tenenamlyame. Utenebuka an mikip yabuka unamlama ara, Allah el mikip melibuka arisilya deice arye unamlame.

⁹Allah el mikip deice arye nun ti, 'Malye ning nirya batakuka, diksukum un ninye uk unamak' tenen, nyabuka melipsukce, akunum lyepsuke. Winipsuka ara, nun teleb ubuka fil dolamupa deice arye, kum lyepsuk bukni, elce minop talak akunum teneamsuk touk, elce nun ti bico tenepsukce, el kanye aryuk nun ti talye melibuka lyepsuke. Allah el kanye aryuk bico teneamsukce, 'Yesus Kristus el fil donamla deice arye, aninye melibuka lyepnamne' tenen, kintiniyamsuk ning ara, Yesus Kristus deice arye kintiniyamsuke. Aning ara, aning-aning min kum kwepdeiamuk talak arye, nun Lyena Deiyoknye Yesus Kristus akunum kintinipdeiamsuke.

¹⁰Bukni winitalak ara, nun lyen ning nirya ara, Yesus Kristus nun Lyena Deiyoknye^a tukwak mutuku akunum yayuk deice arye, akunum lak kipsuk ura, kel kinyabe. Yesus Kristus el fil dopsuka deice arye, ninye dipna deiyok ning akunum, kum daneibuk. Winipsukce, ninye lyena ati, Yesus el lak teleb yupu peterenyaka deice arye, dipkoprop kam una deiyok ning ap, bola koplobuka, fia kam unamap ning ap ara, akunum lak kibuka ati, kel kinyabe.

¹¹Ara, ninye lyena ati, Yesus el laka teleb yupu ara, Allah arye, 'Paulus ara, ayupu bobuka peterlbana ati, deiyoknye, tonda Rasulnye ulirye, ayupu minop talak arye, kum kekelamik mutuku ninye minopce laka nyalbinamle. Tonda, Allah yupu peterena deiyoknye unamle,' teneamnukce, wibuka deipnuka. ¹²'Afil donamle' tenen, wipdeipnuka ati, afil uk donuna ati ara, yuk ninye arye, 'Nun lik' tenen, ikin ning weika arye, na nong deice delininyak ati ara, na kanye mambul kanye bobuka, ikin unulule. Bukni, ikin ning na nong deice upnilya babye, na arye, 'Se' tenen, alye kum dakanune. Ura, talye ati kume. Deiyok ara, ani. Na kanye teniltona fia kum aniryuk, na diba teneamsinye bira, na kele. Na arye Allah ati, 'Fia moubuka kalikinamnel' tenen, el deice uk deiamse ning nirya ara, min kum kum datue. Winitalak arye dipdongobuka, Yesus tamubuka el yanamle talak bukni, anoutam talak nirya ara, Allah arye moubuka kaliknilirye, dinamnile. Na Paulus arye nyapne.

^a 1:10 *Lyena Deiyoknye* – Alkitab noutamak ara, Lyena Deiyoknye sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. Paulus arye Yesus ati sekuk. Tonda, laka nyana yupu nomor 17 dipdelelume.

¹³Ura, na mi Timotiuso, na arye peterelamkise ning nirya ara, Allah el yupu nyasilye touk diksukumuk peterelamsa ati, aning uk talibuka, ance atonun peterenamlyame. Winibuka peterenamlam talak nirya ara, Yesus Kristus ap, kanye dukdongobuka umince, yuk ninye ati bico tenena ap, Allah ati dib tenenyak ning ap, anirya talibuka unamlame. ¹⁴Tonda, nun deiyok nang ap, Allah El Dib Kanye ap, arye an ti, ‘Elce ayupu bobuka peterenamle’ tenen, an deice deipkubu ning nirya, ance, ‘Malye upnilyak’ tenen, fia kanye moubuka kalikimince, dildanamlyame. Winibuka unamlama ara, Allah El Dib Kanye arye, el mikip arisilya deice arye kalikildanamlyame. Allah El Dib Kanye ara, nun kanye noutamak usulule. ¹⁵Timotius, an kele. Asia tam diba teneamik nang nirya arye, na ti akunum bataknike. Aninye kan-kan, sik Pigelus ap, Hermegenes ap, sik bitinye nang babye, bataknirike.

¹⁶Bukni, Onesiporus ap, el aik unyak ninye ap, nirya ati ara, ‘Allah arye aninye nirya ati, wenena kumce, sik patana atonun, mitang arye melibuka arinamle’ tenen, moronune. Deiyok ara, tonok talak uk kum bukni, Onesiporus ara, anirya talak nirya weik arye, na kanye kwa melilamnuk. Tonda elce na ti, ‘Se, Paulus ara, tapu koubuka wenena aik dongobik ati, na alye upnilyak’ tenen, ‘El dam kum binune,’ fia kum tenelamnuk. ¹⁷Aning kum bukni, na Roma mutuku noutamak ulamsi bukni, elce Roma mutuku yayukop ura, ‘Paulus danaka ulul do?’ tenen, fia pi dobuka elamnuk ani, eipdanumurye melilamnuk.

¹⁸Tonda Timotius, an akunum kel biklume. Minop talak Efesus mutuku noutamak fil dolamse talak ara, Onesiporus arye na patalamnuk ning, aning-aning nirya ati, weika arye melyamnuk. Winilamuka nirya ati ara, na patanilibuk utenenune. Ara, ‘Se, nun Ni Allah arye Onesiporus ati kanye deipturye, Yesus tamubuka yanamle talak, yupu bokeipnamsil sum ara, Allah arye talye obuka bataktue bukni, anye birye el malye winilamuk ning nirya ati, namin kibuka, wenena kum arye, talye melibuka teleb updeipnamle’ tenen, moronune.

“Ikin ning ukilya babye, kanye teniltona kum unamlyam bukni, mikip arye unamlyame,” nyabuk yupu

2 ¹Ara, Timotiuso, ance Yesus Kristus ati, diba tenebuka el ap, kanye dukdongobuka uminye talak noutam nirya ara, Yesus arye an ti bico tenebuka, el kanye aryuk talye melikilya deice arye, fia kanye darapdongobuka, mikip arye unamlame. ²Tonda, na arye yuk nang kekelamik mutuku peterepra balamsibuk, ance kekelamlum yupu nirya ara, an babye ayupu dobuka, yuk teleb nang ati peterenamlyame. Peterelbinamlam nang ara, talye nang kum bukni, sikce “Wininamabe,” nyabuka nyanamak touk, aning uk dipkoprop unyakce, diba tenepmanto nang ati peterenamlyame. Tonda, anang arye yuk nang ati, teleb ubuka

peterepting nanguk wibuka peterenamlyame. Talya-talya daunyak nang ara, kume. ³Tonda, sik yin talin nang arye, 'Ikin ning awabsilya babye, telebuka,' tenebikirye, fia pi dobuka fil dolamak touk, na ap, na neiktoto unyap nang ap, ikin upsilibuk, aning tenena kum arye, 'Yesus Kristus el fil don nang, el yin talin nang atonun unamabe' tenen, nyabe. Wininyap touk, Timotius an babye, atonun tenebuka unamlame.

⁴Winira, winipmanto yupu nyapnukine. Talya-talya unyak ninye arye tenebuka, winilamak ning nirya ara, sik yin talin nang koprop arye, aning talibuka kum wininyake. Aning kum bukni, 'Na weik deiyoknye birye kanye deipnamnil' tenen, adeiyoknye birye nyalye yupu uk kekebuka fil donyake. ⁵Aning atonun, sik kil-kil nyanyak nang arye, 'Bik-bik apnin banmakca ani, minop bikcop ura, dekni ning arepnamniak,' tenepting bukni, bik-bik ana deiyok nang arye, "Winibuka, winibuka bik-bik albinamlulume," nyabikke touk kum kekebikirye, talye uk bakcop ura, dipkoprop dekni ning kum dopdopnamake.

⁶Aning atonun, wa wina deiyoknye birye, fia pi dobuka mikip weik arye fil dolinye bira, aminyan talak, awa win dam kouamice ning, akunum wisiplyop ura, elce minop libuka dilule. Yuk nang nirya ara, aminyan talak uk libuka dinyake. ⁷Adomon yupu deice arye nyapmakin yupu nirya ara, 'Deiyok dan do?' tenen, moubuka tenipdeminyebuk, Allah arye, "Ayupu nong ara, ani, deiyok ani," nyabuka lak kipdeipkilibuk, kel biknamlyame.

⁸Nun apu koprop Daud arye deibuk ura, dadeipdanin yangalamik ani, aminyan talak deibik mi, Yesus Kristus ara, obik ura dibuk bukni, tuba tamubuka, kam bukuk. Winibuk ning anirya ara, tuba tenenamlyame. Ayupu ara, Yesus el lak teleb yupu noutam aubuk ak, dobuka peterenune. ⁹Yesus Kristus arye ninye lyena ati, el laka teleb yupu peterenibuk, yuk nang arye, 'Nun lik' tenen, ikin ning weik na nong deice deilinkibuk, kanye imun kanye bobuka unune. Tonda, sik fia malye unyak ninye tomobikirye, tapu koubuka wenena aik dongolamak touk, ayupu peterepnin balamsibuk, tapu koubuka wenena aik dongopnike. Bukni, Allah el yupu ara, ninye arye tapu kum kouptinge. El yupu peterenyakbuk, ninye kekebikirye, diba tenebuka weik arye biknin banamake.

¹⁰Allah el yupu ara, kum sekdongopmanto ulula ati ara, yata ikin ning do nirya, kanye imun ning aupmanilya babye, aning tenena kum arye, afil uk donamne. Wininuna ara, talye ati kume. Deiyok ara, Allah arye minop talak, 'Na mapu unamak' tenen, wibuka deiamuk nang nirya ara, Yesus Kristus fil dopsuka deice arye, lyen ning kintinipsuk ning ara, 'Dipkoprop doproprnamak' tenen, afil kum batakanune. Tonda, 'Doprobikcebuk, aminyan talak Allah arye teleb updeipsilibuk, oyanamle talak noutamak nirya ara, telebuk fia kam unamak' tenen, ikin unilya babye, pi dobuka fia fil donune.

¹¹Anyapnukin yupu ara, fia dipkoprop yupu ati ara, moubuka tenepmince, fia peterenamlyame. Ayupu ara, ani.

‘Allah arye nun ap, Yesus ap, kanye dukdongopsuka ati, Yesus dibuk talak ara, nun ap, dukdongobuka dibupa ati ara, el fia kam unamle talak ara, nun babye, el ap neika kam fia unamabe.’

¹²‘Ikin ning nun nong deice awabsilya babye, batakna kum aryuk, fia pi dobuka fil dona uk ulamibye ura, aminyan talak Yesus arye aning-aning ap, ninye mutuku-mutuku nirya ap, ati, taliplirye, Weik Ninye Deioknye unamle talak nirya ara, nun ap, el ap, aning nirya neika talibuka unamabe.’

‘Bukni, nunce el ti, “Elda nun like,” nyabuka batakipyop ura, elce nun babye, ati ara, “Aninye ara, na like,” nyabuka bataknamside.’

¹³‘Nunce, “Wininamabe,” nyaptibye bukni, mikip ning mitang upsilibuk, nunce fil kum dopmanto usilirye batakibye ababye, Yesus arye, “Na mapu ati wininamsine,” nyabuka nyalilamsuk yupu dipkoprop winipnamside. Tonok ning babye, kum bataknamle. Ara, el bidamnye arye el bidamnye ati, kum batakmento ulula ati nyapne.’

**‘Allah el fil donak ati, teleb ninguk unamne’
tenen, “Pirildenamlume,” nyabuk yupu**

¹⁴Ara, Timotiuso, na arye nyapnukin ning ara, ‘Diba tenenyak ninye arye, tuba tenenamake’ tenen, ila tonap, fia peterena uk wininamlame. Ara, “Allah disululce, yupu bokeipnamside ati, kanye mouplulume,” nyabuka peterenamlam yupu ara, ani. Ara, “Ninye arye talye-talye yupu ati, yu uplibuk, nyaldanyak ning ara, batakululume,” nyanamlyame. Tonda, “Yupu deice arye waldaluluma ara, teleb kum winililalulume. Yupu ati waldalulum nang ap, waldamunyebuk, eibikirye, ayupu kekenyak nang ap, malye uk winililanyake,” nyabuka peterenamlam.

¹⁵Aning kum wininamlam bukni, Timotius anda, ‘Allah arye kanye deipnamnil’ tenen, tonda, ‘Fil fia teleb ubuka donanye unamne,’ tenenamlyame, nyapkine. Tonda, ‘Allah arye winipdenilop ura,’ “Anye bira, telebuka,” nyapnamnile. Allah el dipkoprop yupu nyasilye touk, diksukum peterenanye ununa ati ara, ‘Alye kum dakanamne,’ tenebuka unamlyame. ‘Winipnyop ura, Allah arye kanye deipnamnil,’ tenebuka unamlyame. Ayupu fia tenebuka unamlame. Na Paulus arye Timotius an ti nyapkine.

¹⁶Tonda, ayupu peterenamlyame. Allah fia diksukum ulye touk kum bukni, fia malye-malye yupu nyaltakalamak nang ara, sik yupu kekena kume. Ayupu kekenyak nang ap, ayupu nyanyak nang ap ara, akunum malye wininyak bukni, ayupu nyanyaka deice arye, Allah el ulul ning atonun kum bukni, weika arye tonap, fia malye winipnin banamake.

¹⁷Winipmanto yupu nyapnukine. Butbutukne suse deiyok kibuka disilye

talak ara, mitik uk usululbuk, fia dilamsilya ani, weik upnin balyop ura, weik barye suse disulule.

Aning atonun, afia malye yupu nyanyak nang, peterenyaka deice arye, ninye weik arye tonap, malye winilinyake. Aning atonun peteren nang ara, Himeneus ap, Piletus ap, ururake. ¹⁸Anang bitinye ara, Allah el dipkoprop bisik balamrikbuk, akunum lekuka, yuk malye bisik birikce, tilila ninguk talibuka winirurake. Abitinye nang arye, “Kume, Allah arye akunum diamik nang kam bukeipnamla ara, akunum ubuk,” nyarurake. Ayupu peterericka deice arye, ton nang kekebikirye, Yesus ati diba tenepnin banyak ning ara, akunum batakanyake. Tuba Yesus ati dib kum tenenyake.

¹⁹Aninye ara wininyak bukni, Allah arye nyapsuk yupu ara, min kum upsutue. Winipmanto ara, fia teleb ayukumna yo, gat yo iknabuk, fia gat ulamle atonun, Allah arye nyapsuk yupu ara, min kum kum datue. Allah el yupu noutamak sekamik yupu deice arye, lak kipdeipsuke. Ayupu ara, ani.

‘Allah arye, ‘Aninye na mapu unamake’ tenen, akunum wipdeiamsuk ninye ara, el akunum kel bikamsuke.’ *(Bilangan 16:5)*

Tonda,

‘Yata nang do nirya, “Allah ati akunum diba tenepsa ati, el mi unune,” nyanyak nang nirya ara, adip aryuk malye winin ning nirya ara, batakikirye, balye tamubuka diksukum bisik uk banamake.’

²⁰Ara, Timotiuso, na Paulus arye yuk domon yupu ton nyapnukine. Weik asik dolamak noutam nirya ara, aning-aning weik deilinyake. Ton ning ati ara, ‘Aning dobuka weik mambul talak ati, mambul fil uk donamape’ tenen, dekna weik ning, emas ap, perak ap, doprobikirye puturubuka deilinyake. Ton ning ati ara, ‘Aning dobuka, talye sum nirya deice arye mambul kum fil uk donamabe. Aning ara, ilil kume’ tenen, talye awablye ning, yo ap, tapu ap, kat tuku ap, doprobikirye, memenyake.

²¹Aning mitiktonun, yatanye do nirya, mambul un ning, malye ning yala-yala nirya ati, bataktop ura, teleb fil donanye unamle. Winipmanto ara, elda weik aik fum dekna weik ning ulye touk, weik mambul fil talibuka dopmantonye unamle. Atonye, el deiyoknye Allah arye anye biti, el malye winin ning kum kipdeiplyop ura, anye biti teleb kipdeipnamle. Teleb akunum winibdeiplyop ura, weik mambul fil aning-aning nirya talibuka, el li koprop ati, teleb fil melibuka dopmantonye unamle.

²²Ati Timotiuso, sik kam kili sal arye malye ning patapliba, winilamak ning ati, bita dipdemince, yuk karin ak unamlyame. Amalye ning nirya batakuka, diksukum winin ninguk tenebuka unamlyame. Tonda, Yesus ati diba tenena ap; yuk nang ati bico tenebuka melina ap; malye kanye

bona kum arye, yuk nang ap, kanye deibuka, ‘Nimalye arye neika unamabe’ tenena ap; aning nirya ara, tenena uk unamlame. Ara, anuk kum bukni, sik yuk nang, tenepce arye talye nyana kum bukni, sik kanye talima diksukum unyak ninye arye, nun Deiyoknye Yesus ati, diba tenenyak nang ap, ateleb ninguk tenebuka neiktoto uk unamlulume.

²³Ara, sik yuk ninye arye, ‘Deiyok ani,’ kum tenepmanto yupubuk, walwal arye nyapdakibuk, yu uplirye, yupu deice waldanyak yupu nirya ara, ance kum kekenamlame. Talya-talya yupu ap, walwal arye nyanyak yupu ap, ati, yupu talibikirye, yu uplirye, derelana ap, waldana ap, nyanyak yupu nirya ara, teleb kum updeipsutue. An kele, ayupu ara, malye ulisulula ati, ayupu nirya ara, kekena meme. Tonda ato yupu ara, nyana kume.

²⁴Tonda, Allah el fil dona ati melina ninye ara, yupu deice arye yu uplirye, derelana ara, fia meme. Yu uplirye, malye yupu nyaldana kum bukni, Allah el fil melina ninye arye yuk nang ati, nimalye arye teleb ubuka adip aryuk melinamake. Yuk nang ati, adip aryuk teleb ubuka peterepnamake. Yuk nang arye, Allah el fil don nang ati, malye updeisicka babye, ‘Malye winipdeipmaniak,’ kum tenenamake. Aning ati lubakibikirye, tuba tenena kum unamake. Kanye nimalye aryuk teleb unamake.

²⁵Yuk nang arye, Allah el yupu peteren nang ati, ‘Nun lik’ tenen, el yupu yanibikirye, malye kibuka bisibikcop ura, elce anang ati, teleb yupu nyabuka, nimalye arye peterenamle. Sik walwal arye wininyak ning ati lipsisikuka peterenamlyame. Ara, talye ati kume. Ara, ‘Allah arye anang ati, sik kanye noutamak fil melibuka doptubuk, sikce, “Nun malye un ning batakape,” nyaptingce, Allah el bisik uk tamubuka yanamak do?’ tenen, nimalye arye peterenamlume. ‘Sik malye ning batakikcop ura, Allah el dipkoprop yupu kel biktingce, teleb uptinge,’ tenenamamlame.

²⁶Tonda, Isa Mutuku Dongonye arye, ‘Na malye fil uk donamniak,’ tenen, sik kanye talima tapu koubuka deibuka ati ara, el ikne fumbisik atonun unyake. Bukni, Allah el dipkoprop yupu kel kibting deice arye, ‘Se, nun mankau arye malye winilamubu bukni, winira, akunum kel bikmapa ati, aning bataknuyabe,’ tenebikirye, ‘Moubuka tenepnamak’ tenen, nimalye arye peterenamlyame.

“Sirya talak ara, ninye mutuku-mutuku nirya arye, Allah batakuka fia malye weik winipnin banamake,” nyabuk yupu

3 ¹Timotiuso, anyapnukin yupu ara, moubuka tenenamlyame. Tukwak mutuku nirya kum upnamle ati, sirya daknamle talak ara, kanye imun ning weik unamle. ²Ninye mutuku-mutuku nirya arye fia malye wininamak ning ara, nyapnukine. Ara, sik bidamnye arye, sik bidamnye ati tenena uk unamake. Yuk nang ati bico tenebuka kum melinamake.

Tonda, ‘Yo bok weika arye doproptibye’ tenen, kanye engeplibuk, unamake. Aninye nirya arye, “Nunda fia teleb nang,” nyabuka kanye erena ap, sik babye kanye aryuk erepdeipdakirye, dilana ap, yuk nang ati yu uplirye, sik nong deice malye yupu nyabuka delinamake.

Winibikirye, sik ni yapu ap, sik nin yapu ap, nyanyak yupu ati, yanibuka kum kekepnamake. Tonda, yuk nang arye teleb kipdeipsikibuk, anang arye, “Telebe,” nyabuka, kina kum unamsiake. Allah winilul ning nirya ati, ‘Nun lik’ tenen, fia malye uk wininamake. ³Yuk nang nirya ati, bico tenebuka kum melinamake. Yuk nang arye malye usikce ning ati, ‘Dauplye’ tenen, luba kina kum arye, fia tenena uk unamake.

Yuk nang arye, ton nang ati, ‘Malye nang, tenepnamak’ tenen, tilila yupu bukni, “Anang arye malye wininyak ning ara, ani,” nyabuka minilana uk unamake. Tonda anang arye, ‘Malye upnun do?’ tenen, kanye moubuka tenena fia kum arye, sik tenenyak ning nirya, talye parapkabuka wininamake. Sikce yuk nang ati, yu weik uplibuk, ona uk unamake. Teleb un ning aning-aning nirya ati ara, ‘Nun lik’ tenen, batakanamake.

⁴Anang arye yuk nang ati, tenepce arye teleb yupu yukuna ati, talye nyanamak bukni, aminyan ara, anang deice ikin ning delinamake. Tonda, sik winipnamak ning ati, ‘Winipnyop ura, aminyan talak yata winipnamnil do?’ tenena kum aniryuk, ‘Talya parapkabuka winipnune,’ tenebuka malye uk wininamake. Sirya talak unamak ninnye arye, sik bidamnye ati, ‘Nunda fia teleb nang, nun uk ara, fia mambul’ tenen, sik kanye erelilanamake. Anang arye, Allah el winilul ning ap, Allah el ap, ati, kanye kum deipnamak bukni, sik patan ning atibuk, ‘Kanye deibuka talye-talye uk unamap’ tenebuka malye wininamake.

⁵Allah el si erena ap, el ti kina ap, ati ara, talye nong bol deice ninguk unamak bukni, sik kanye noutamak ara, ‘Allah el yupu ap, el winilul ning ap, atonun winiptibya babye, aniryu deice arye, el mikip weksuturye, mikip kum keipsutue’ tenen, wininamake. ‘Allah el mikip ara, kum ulula anya arye, aning nirya ara, nong kum upnamle ninguk,’ tenebuka wininamake. Sirya talak unamak ninnye arye, anyapmasuk touk winipnamaka anya arye, Timotius anda, anang atonun nang ap, neika una kume. Leibuka yukak uk unamlame. Na Paulus arye nyapkine.

⁶Arup nyapmasinto nang arye wininyak ning ton nyapnukine. Sik tenepce arye teleb yupu nyabuka yukulakirye, yuk nang aik wekuka neika unyake. Yuk nang aik yupu teleb nyabuka yukulakirye, akunum bikcop ura, anyaik unyak kilapu ati, talye yupu nyana deice arye kekebikce ura, sik anang kilongonyake. Akilapu ara, ‘Aning winipnun do, kum do? Teleb ning dan do?’ tenen, teniltona uk unyak kilapu ati, anang arye akilapu sik kanye talima lilon yupu nyabikibuk, kekebikirye, anang tam uk kilongonyake. Sik nyanyak yupu ara, akilapu arye talye luba kibuka kekebikirye, diba tenenyake.

Akilapu ara, sik malye winin ning weik arye unyaka ati ara, diksukum bisik ara, kum banyake. Tonda, sik kanye talima noutam malye ninguk pataplibuk, aning uk tenenyaka deice arye, sik kanye lipdongoplibuk, yuk malye bisik kirikuka banyake. ⁷Akilapu arye, ‘Peterpsikibuk, kelbipnuyap’ tenen, kekelbanyak bukni, nong kum upnamla anya arye, bita kum kel biknamake. Akilapu arye, ‘Allah el dipkoprop nyasilye yupu anye’ tenen, moubuka kum kel biktingce, ayupu kekebuka kum taliptinge. Fia malye uk wininamake.

⁸Tilila yupu nyalamak bukni, yuk nang aik duknubuka binamak ninye ara, Allah el dipkoprop yupu nirya ara, yaniptabikirye, yupu sekenyake. Minop talak ulamrik nang Yanes ap, Yambres ap arye, Musa nyalamuk yupu ati yanibrikce, el yupu seklamrik touk, anang arye atonun Allah el yupu ati, yanina uk wininamake. Sik kanye talima noutam nirya ara, fia kwalibukba, akunum malye uk ubuka anya arye, sikce Allah ati diba kum teneptinge. Allah arye sik ti, kanye kum deililule. Allah arye sik anang ati akunum batakuke.

⁹Minop talak Yanes ap, Yambres ap, arye, Musa yupu yanilamrik bukni, aminyan talak ara, yuk nang nirya arye, ‘Kume, sik winirudak ning ara, fia walwal arye winirurake. Aning nirya ara, nong kum upnamle’ tenen, kel kiyamik. Aning atonun, asirya talak tilila nyanyak nang ati ara, yuk nang arye, ‘Kume, sikda fia walwal aryuk nyanyake,’ tenebuka kel biknamak. Ati, yuk nang weik arye dobuka, malye bisik kum bobinamake. Na Paulus arye nyapkine.

Paulus arye Timotius ati, “Kanye moubuka unalyame,” nyapdeibuk yupu

¹⁰Sirya talak ara, sik malye ning wininamak bukni, Timotius anuk ara, aning atonun kum wininamlyame. Ance na winilamse ning nirya ara, akunum kel bikamnulume. Ara, na winilamse ning ap, na peterelamse yupu ap, na arye, ‘Winipnamne’ tenen, fil dolamsa deiyok ning ap, Allah ati dib tenenun ning ap, ikin ning wamnuuk bukni, wana kum, nimalye arye winilamse ning ap, yuk nang ati bico tenebuka melilamse ning ap, ikin ulamnuk bukni, batakna kum arye fia pi dobuka, fil dolamse ning ap, aning nirya an akunum kel bikamnulume. ¹¹Tonda, Allah yupu peterelamsa ati, malye nang arye na nong deice ikin ning deililamnik ning ap, yuk ikin wamnuuk ning ap, anirya ara, an akunum bikamnulume.

Tonda, Antiokia mutuku ap, Ikonium mutuku ap, Listra mutuku ap, peterelbisi talak noutam, Allah yupu peterelamsibuk, amutuku ninye arye, ‘Nun lik’ tenen, ikin ning weik na nong deice deililamnik bukni, kum batakisirye, fia fil dona uk winilamse ning babye, an akunum kel bikamnulume. Kanye imun ning weik ulamnuk noutam, nun Ni Allah arye lobuka lyepnuke.

¹²Malye nang arye, ‘Allah yupu nun lik’ tenen, ikin ning weik na nong deice deiamnik ning ara, na tonok kume. Dipkoprop ning ara, yata nang do nirya, ‘Yesus Kristus ap, kanye dukdongobuka Allah yupu nyasilye touk, nun diksukumuk unamyabe,’ tenenyak nang nirya ati, malye nang arye sik nong deice ikin ning delinamake. ¹³Atalak noutam nirya ara, malye wininyak nang ap, tilila yupu tenepce arye, nyalamak nang ap, malye akunum wininyak bukni, weik arye tonap, tabakuka fia malye wininyake. Sikce yuk nang ati, ‘Tilila ning ati diba tenepnamak’ tenen, tilila yupu talye tenepce arye nyanyake. Aning atonun yuk nang arye aninye ati, tilila yupu nyakibuk, aninye diba tenenamake.

¹⁴Timotiuso, sik malye nang ara, winibuka wininamak bukni, anak ara, kume. Allah el yupu akunum diba teneplumce, kanye bokoltona kum bukni, dib tenebuka kel bikamlumce, mikip arye taliplum ning nirya ara, batakna kume. Sikce peterelamkik ninye ara, diksukumuk ulamikbuk, aninye kan-kan akunum kel bikamluma ati, ayupu nirya moubuka talipmince unamlyame.

¹⁵Tonda, an mitik mi ulamlum talak arye dipdongobuka, anoutam talak nirya, Allah el fia diksukum yupu peterelamkikbuk, akunum kel bikamlume. Allah yupu peterelamsiaka deice arye Allah, ninye ati lyesulul yupu ap, lyen ning ap, nirya ara, kel bikinyabe. Nunce Yesus Kristus ati, dib tenenyap deice arye, Allah lyesulule. Aning nirya ara, Allah el yupu deice arye kel bikinyabe.

¹⁶Allah yupu seklamika nirya ara, Allah elcuk nyalilamukbuk, sik kanye noutamak kekelamikce yupu seklamik. Allah elcuk, ayupu nirya nyalilamuka anye arye, el yupu dopropbibirye, ninye peterena ap, malye ubice ura, “Malye upmaluma ara, ani,” nyabuka, wenena ap, amalye upnin bana ara, “Aning batakuka teleb winina ara, ani,” nyabuka lipsisikuka peterena ap, tonda, “Malye winin ning nirya batakuka, Allah yupu nyalye touk diksukum winina ara, ani,” nyabuka peterena ap, anirya ara, Allah yupu deice dopropbibirye, afil-afil nirya teleb ubuka donyabe. ¹⁷Anyapmakin fil nirya donyapa deiyok ara, Allah el fil melina nang nirya ati, fia teleb ubuka peterebibibuk, kel biknamaka deice arye, ‘Teleb fil aning-aning nirya, teleb ubuka sirya dakdongobuka dopnamak’ tenen, Allah yupu dobuka peterebibibuk, sik ap, afil nirya donamabe.

Allah arye, ‘Na fil donamnil,’ teneamkuk fil nirya ara, “Dolaminya ani, sirya daknamlyame,” nyabuka, Paulus arye Timotius ati nyabuk yupu

4 ¹Winira, na mi Timotiuso, Allah ap, Yesus Kristus ap, sik bitinye arye dinmasirakbuk, ayupu nyapnukin ati, kanye moupnamlyame. Yesus Kristus arye, sik akunum diamikce ninye babye, el yanamle talak tuba kam unyak ninye babye, yupu bokeipnamsile. Tonda, el ila tamubuka tonap, lak yalirye, aning-aning nirya talibuka, weik deiyoknye

unamsila ati ara, ayupu talye kekeltakana kume. Dipkoprop adip aryuk wininamlyame.

²Ara, yuk ninye arye kanye deibuka, “Peterepsilyame,” nyanyak talak babye, ura, lik uplibuk, “Peterena nun lik,” nyanyak talak babye, anda, ‘Yata tenepnuniak do?’ tenena kum arye, ‘Allah yupu peterepnaman’ tenen, kintinilina uk unamlame. Malye upmakece talak ara, ance, “Aning batakululume, teleb una ara, ani,” nyabuka lipsisikuka peterenamlyame.

Tuba malye unyak ninye ati, “Aning ara, meme. Batakululume,” nyabuka, yupu sekenamlyame. Teleb akunum wininyak nang ati, “E, aning ara, telebe, aning ara, fia atonun wininamlulume,” nyabuka, sik kanye moulinamlyame. Anyapmakin fil donamlam talak nirya noutam arye, fia moubuka tenepmince, Allah el yupu nyasilye touk, teleb ubuka peterenamlyame. Tonda, aninye nirya ati, minopce wana ap, lik una ap kum bukni, nimalye aryuk peterenamlyame.

³“Wininalyame,” nyapmakina ara, talye ati kum nyapkine. Deiyok ara, aminyan talak ara, ninye nirya arye, ‘Allah yupu nyasilye touk nun lik’ tenen, diksukum peteren yupu kum kekepnamake. Peteren yupu dipkoprop kum bukni, ‘Nun kanye delinyap ning ap, nun patapsilye ning ap, aning uk peterepnamsiak’ tenen, “Buluplulume,” nyabikibuk, peteren nang talye-talye nanguk bulupnamake. Bulubikibuk, aninye arye, sik talye yupu peteren nang ati, “Nunce nyabipye ning uk, peterepsululume,” nyabuka moronyak yupu uk, sik talye peteren nang arye aning uk peterepnamake. Dipkoprop Allah yupu nyalye touk kum peterenamake.

⁴Aninye nirya arye, Allah el dipkoprop yupu nyasilye touk pataplibuk, kum kekepnamake. “Aning ara, nun lik ati, nun like,” nyabikirye, talye-talye nyanyak yupu, nong kum upnamle yupu uk kekepnamake.

⁵Sikda wininamak bukni, Timotius anak ara, kanye teniltona ap, kanye walwal una ap, kum unamlyame. Sirya talak nirya ara, kanye moupmince, moubuka tenenamlyame. Ikin ning weik aupkilya babye, batakna kum arye, fia pi dobuka fil donamlyame. Allah yupu min kum kekelamik ninye ara, ‘Sik ton kekeptinge’ tenen, Allah el ninye lyen yupu laka peterelbana uk unamlyame. Allah arye aryamkuk fil nirya ara, tonok ning babye, batakna kum arye, sirya dakanamlyame.

⁶Ayupu nyapmakina ara, talye ati kum nyapkine. Deiyok ara, ani. Yahudi yala ninye arye, Allah el si erena ati, kam ning obuka arilyamik talak bukni, sirya dakana ati, anggur mek ton dobuka, aning deice dikilongolamik touk, na wininune. Ara, Allah teneamnuk touk, fil dopra balamse ani, sirya dakna talak dam upnila anya arye, na dipnamne talak dam upnile. ⁷Ara, sik yin talin nang arye, batakna kum aniryuk, malye nang ati olbalamikirye, malye kibuka batakalamak touk, akunum winilamse. Tonda, bik-bik nyan nang arye, ‘Dekni ning dopdopnyap’ tenen, batakna kum, pi deipna arye pibuka bik-bik abuka balamak

touk, akunum winilamse. Anyapmakin yupu nong ara, Allah ap, el yupu ap, ati, diba teneamse ning ara, kum batakamsirye, fia moubuka tuba talinune. Allah aryamnuk fil ara, akunum dobuka sirya daknin banmane.

⁸Winibuka ulamse ani, winitalak babye, tuba wininune anya arye, Allah arye dekna ning kintinibuka ara, dipkoprop doproprnamne. Ara, Yesus arye ninye mutuku-mutuku nirya ati, yupu bokeipnamsil sum ara, fia diksukum yupu bokolina deiyoknye Allah arye na ti, malye ning nirya kilipnilirye, fia diksukumnye kipnamnile. Dekna ning doproprnamne ara, aning uka. Fia teleb updeipnamnil ara, na uk ati kume. Aning kum bukni, yata nang do nirya, ‘Se, nun Deiyoknye Yesus arye, ila tamubuka tonap, tukwak mutuku tamubuka yasutue’ tenen, buku sukubuka, kintinibuka dina uk unyak nang nirya ati, dekni ning aripnamsil ning ara, diksukum kili sal daneipnamsile. Na Paulus arye nyapkine.

Asurat sirya dakana ati, nyabuk yupu

⁹Winira Timotiuso, ‘Paulus dam minop binop’ tenen, fia piriipdenamyame. ¹⁰Deiyok ara, na melipnuknye Demas ara, talye tukwak mutuku ulul ning nirya ati, ‘Aning ara ilil ulul. Na doproptinye’ tenen, kanye engelamuka ati, akunum bataknuke, Tesalonika mutuku biyuk. Kereskes ara, Galatia tam biyuk touk, Titus ara, Dalmatia mutuku akunum biyuk. ¹¹Ati, na melinanye, tonoknye Lukas ap unyame. Ati, Timotiuso, ance na dam yanamlam talak ara, Markus dobuka boyanamnyame. Allah el fil donye talak ara, Markus arye teleb ubuka melinulula ati nyapkine. ¹²Na kwit Tikikus ara, Efesus mutuku dopkwetepse.

¹³Ura, Teroas mutuku noutam na ka Karpus ap, neika ulamnumu talak ara, na deice ongon bupu aling luba kipsirye, batakse. Timotius ance na dam yanamlam talak ara, aongon aling ap, na buku ap, surat ap, libuka boyanamnyame. Na batakse buku-buku nirya boyanamnilam bukni, ‘Weik mambul,’ tenenye ning ara, kam uning obukabikce, bola koplobuka kiting ak mikikbuk, sisal lebuk ura, abola deice Allah yupu sekik ning ara, luba kina kume. Aning babye, boyanamnyame.

¹⁴Ura, yuk yupu nyapnukine. Tonoknye el si ara, Aleksander ara, kat ning tembaga dobuka, aning-aning memelulnye birye, ikin ning fia weik arye, na nong deice delilamnuk. Elce na ti, kanye imun ning weik aryamnuk. Ati ara, Allah arye anye bira, kwa dibuka wenena ati, kanye imun ning weik arinamle. ¹⁵Nunce Allah yupu peterelamubu ning ati, mikip arye yupu seklamsukce, yanilamsuka anya arye, Timotius ance, ‘Anye bira malye upnilyak’ tenen, kanye moubuka kalikdanalyame.

¹⁶“Paulus malye winibuk ning ani,” nyabuka, ‘Yupu bokeipnamap’ tenen, yu nang arye na dobuka, yupu bokolina deiyok nang dam bobinik talak, minopce aning ara, na yupu melina ati, tonoknye

babye, yupu nyabuka kum melipnuke. Sik nirya arye na batakuka bindopnik. Winipnik bukni, ‘Allah arye aninye na batakunik ning ati, kum weneplyrye, talye namin kipnamle’ tenen, Allah moronune. ¹⁷Anang nirya batakunik bukni, nun deiyoknye Yesus, na dam yanuka melipnuka deice arye, el mikip arepnukbuk, na yupu teleb ubuka nyapse deice arye, atalak bulupmek Yahudi yala kum ninye nirya arye, Allah el ninye lyen yupu kekebik. Atalak ara, aninye arye talye merekukua oplopmanitinge. Bukni, Yesus arye lobuka lyepnuka ati, sikce kum opnike.

¹⁸Atalak arye melipnuk touk, aminyan yanamle talak noutam nirya ara, malye ninye arye na ti, ‘Paulus optibye,’ tenepniting bukni, na kele, nun Deiyoknye Yesus arye lyepnamnile. Winibuka ulamnilya ani, aminyan talak ara, elce aning-aning nirya talibuka, weik deiyoknye unamlak ara, teleb ubuka dopdopnilirye, im deice bobinamnile. ‘Ninye mutuku-mutuku nirya arye, el Yesus ati, el si erebuka el si fia erenamak’ tenen, patanulule. Anyapman touk, ‘Winipting’ tenen, “Amin,” nyapne.

**“Na kayapu ati, ‘Telebe nyapmasile,’ nyabuka
nyapdeipnamlyame,” nyabuk yupu**

¹⁹Na mi Timotiuso, na kayapu Akwila ap, el kil Pereskila ap, ura, na ka Onesiporus ap, el asik nang nirya ap, ati, “Paulus arye telebe nyapmasile,” nyabuka lak nyapdeipnamnalyame. ²⁰Nun kwit Erastus ara, Korintus mutuku tuba unmale. Tonda, Miletus mutuku binumu talak ara, na ka Teropimus uk dibuk ura, elda asukum uk batakuka bise.

²¹Timotiuso, arukna wala li upnamle dam akunum ubuka ati, aning min kum upmalye talak, ‘Minop na laka nyalyanutume’ tenen, moropkine. Na ap, unyak ninye arye an ti, “Telebe,” nyalikinyake. Sikda, Ebulus ap, Pudes ap, Linus ap, Kelaudia ap, ura, amutuku diba tenenyak nang nirya ap ati, na arye nyapkine. ²²Nun Deiyoknye Yesus ap, an ap, talima dukdongobuka neika unamkil talak noutam, ‘Melinamkil’ tenen, Allah morokunune. Tonda, ‘Allah el kanye aryuk bico tenekilirye, talye melinamkile,’ tenen, Allah morokunune.

Telebe, na Paulus arye nyapkine.

Asukum anyuk deipkine.